

Վրաց ներկայացուցիչը շարունակեց պնդել իր տեսակէտի վրա, իսկ այդ միջոցին Վրաստանի կառավարութիւնը, օգտուելով թիւրքերի հեռանալուց, հակառակ Հայաստանի կառավարութեան կտրուկ բողոքներէ, գրաւեց Ախալքալաքի գաւառը. դեկտ. 5-ին վրաց զօրքերը, զօր. Մակայեւի գլխաւորութեամբ, մտան Ախալքալաք և յայտարարեցին միացած Վրաստանին: Վրաց կառավարութիւնը պատասխանեց Հայաստանի կառավարութեան, թէ՛ «Ախալքալաքի գաւառի նւաճման հարցը ո՛չ պատմական, ո՛չ քաղաքական և ո՛չ էլ բարոյական տեսակէտից վիճելի չէ»: Եւ այդ «անվիճելի» իրաւունքը իրականացնելու համար դեկտ. 8 ու 9-ին, վրաց զօրքերը գէնքի ուժով ստիպեցին սակաւամարդ հայ զօրամասին թողնել Ախալքալաքի գաւառի Եֆրեմովկա և Տրոյիցկոյէ գիւղերը, որ հայերը գրաւել էին թիւրքերի հեռանալուց յետոյ:

Ախալքալաքի ու Լոռիի գէպքերը մեծ յուզում առաջ բերին Երևանում: Կուսակցութիւնները, Հայաստանի Խորհուրդը, կառավարութիւնը, հանրային կարծիքը միաբերան դատապարտում էին վրացիների ընթացքը: Հայ. Խորհուրդը մի շարք դռնփակ նիստերում քննելով դրութիւնը՝ կառավարութեան տւեց գործելու ազատութիւն՝ պարտաւորեցնելով նրան դիմել ամէն միջոցի՝ պաշտպանելու համար Հայաստանի իրաւունքը Ախալքալաքի, բայց, մանաւանդ, Լոռիի վերաբերմամբ: Այս հարցում տարակարծութիւն չկար. բոլոր կուսակցութիւնները Լոռին համարում էին Հայաստանի անբաժանելի մաս: Հայ ժողովրդի բոլոր խաւերի գաղափարն էր արտայայտում, երբ սահմանավէճի առթիւ պատմաբան Լէօն գրում էր. «Երկու հազար տարւայ պատմութիւնը տանում հասցնում է այն եղբակացութեան, որ առանց Լոռու երկար դարաշրջաններում չէր կարելի երեակայել Հայաստան: Ներկայումս այս բանն աւելի ևս աներեակայելի պիտի համարել, քանի որ կտրել Լոռին Հայաստանի մարմնից կը նշանակէ յօշոտել նրա ամբողջ անցեալը և նրա կուրուրական գանձերը — դարերի և հարիւրաւոր սերունդների մեծագործութիւնը թալանի տալ»\*):

Ծերեթելիի համար Լոռին «ոսղմագիտական սահման» էր, հայերի համար՝ հայկական մարմնի մի մաս: Եւ այդ մարմինն էր, որ յօշոտում էր չարաչար վրաց զօրախմբերի կողմից: Դեկտ. 9-ին և ապա 12-ին Հայաստանի կառավարութիւնը նորից դիմեց վրաց կառավարութեան՝ խնդրելով, յանուն երկու ժողովուրդների բարիքի, վերջ տալ հարստահարութիւններին, դուրս բերել վրաց զօրքերը Լոռիից և սահմանի խնդիրը կարգադրել խաղաղ բանակցութիւններով: «Մերժման պարագային, գրում էր Քաջագնունին իր դեկտ. 12 դիմումագրի մէջ, Հայաստանի կառավարութիւնը ստիպւած պիտի լինի ձեռք առնել անհրաժեշտ միջոցներ՝ պաշտպանելու համար Հայաստանի քաղաքացիներին վրաց զօրքերի բռնութիւններից ու շահատակութիւններից»:

Վրաց կառավարութեան պատասխանը եղաւ բացասական. Թիֆլիսի կառավարութիւնը շարունակում էր պնդել իր «անվիճելի» իրաւունքների վրա, առանց հաշի առնելու հայերի նոյնպէս «անվիճելի» համարող իրա-

\* ) Լէօ, «Սահմանավէճեր», 1919թ., Թիֆլիս, էջ 24.